

四庫全書

史部

欽定四庫全書

北史卷六十八

唐

李

延

壽

撰

列傳第五十六

豆盧寧

子勣

孫毓

楊紹

子雄

王雅

子世積

韓雄

子禽

賀若敦

子弼

弟誼

豆盧寧字永安昌黎徒何人其先本姓慕容氏燕北地王精之後也高祖勝以燕皇始初歸魏授長樂郡守賜

姓豆盧氏或云北人謂歸義為豆盧因氏焉又云避難
改焉未詳孰是父萇魏柔玄鎮將有威重見稱於時武
成中以寧勲追贈柱國大將軍少保涪郡公寧少驍果
有志氣身長八尺美姿容善騎射魏永安中以別將隨
尔朱天光入關以破万侯醜奴以功賜爵靈壽縣男嘗
與梁仙定遇於平涼川相與肄射乃相去百步縣莎草
以射之七發五中合定服其能贈遺甚厚天光敗從侯
莫陳悅及周文討悅寧與李弼來歸孝武西遷以奉迎

勲封河陽縣伯後進爵為公從禽竇奉復弘農破沙苑
除衛大將軍兼大都督大統七年從于謹破稽胡帥劉
平伏於上郡及梁仙定反以寧為軍司監隴右諸軍事
賊平進位侍中使持節驃騎大將軍開府儀同三司九
年從周文迎高仲密與東魏戰於芒山遷左衛將軍進
爵范陽郡公十六年拜大將軍羌帥傍乞鐵公及鄭五
醜等反叛寧討平之恭帝二年改封武陽郡公遷尚書
右僕射周孝閔帝踐阼授柱國大將軍武成初出為同

州刺史遷大司寇進封楚國公邑萬戶別食鹽亭縣一
千戶收其租賦保定四年授岐州刺史屬大兵東討寧
興疾從軍薨於同州贈太保十州諸軍事同州刺史謚
曰昭初寧未有子養弟永恩子勣及生子讚親屬皆請
讚為嗣寧曰兄弟之子猶子也吾何擇焉遂以勣嗣時
以此多之及寧薨勣襲爵

勣字定東生時周文親幸寧家稱慶時遇新破齊軍周
文因字曰定東勣聰悟有器局初以勲臣子封義安縣

侯周明帝受禪授稍伯下大夫開府儀同三司改封丹陽郡公明帝時為左武伯中大夫勣自以經業未通請解職遊露門學帝嘉之敕以本官就學齊王憲納勣妹為妃恩禮愈厚武帝嗣位渭源燒當羌因饑作亂以勣有才畧拜渭州刺史甚有惠政華夷悅服大致祥瑞鳥鼠山俗呼為高武隴其下渭水所出其山絕壁千尋由來乏水諸羌苦之勣馬足所踐忽飛泉涌出有白鳥飛上廳前乳子而後去有白狼見於襄武人為之謠曰我

有丹陽山出玉漿濟我人夷神烏來翔百姓因號其泉
曰玉漿泉後丁父艱毀瘁過禮襲爵楚國公大象二年
累遷利州總管尋拜柱國隋文帝為丞相益州總管王
謙作亂勸嬰城固守謙將達奚悉等攻之起土山鑿城
為七十餘穴堰江以灌之勸時戰士不過二千晝夜相
拒經四旬梁睿軍且至賊解去授上柱國賜一子爵中
山縣公開皇中為夏州總管帝以其家貴盛勲効克彰
後為漢王諒納其女為妃恩遇彌厚七年追守利州功

詔食始州臨津縣邑千戶十年以疾徵還京師詔諸王並至勸第中使顧問道路不絕卒謚曰襄子賢嗣位顯州刺史大理少卿武賁郎將次子毓

毓字道生少英果有氣節漢王諒出鎮并州毓以妃兄為王府主簿以征突厥功授儀同三司及煬帝即位諒納諮議王頗謀作亂毓苦諫不從因謂其弟懿曰吾匹馬歸朝自得免禍此乃身計非為國也今且偽從以思後計毓兄顯州刺史賢言於帝曰臣弟毓素懷志節必

不從亂但逼兇威不能克遂臣請從軍與毓為表裏諒
不足圖也帝許之賢密遣家人齎救書至毓所與之計
諒將往介州令毓與總管屬朱濤留守毓與濤議拒之
濤拂衣不從毓追斬之時諒司馬皇甫誕以諫被囚毓
出之與協計及開府盤石侯宿勤武等閉城拒諒部分
未定有人告諒諒攻之城陷見害時年二十八諒平贈
大將軍封正義縣公諡曰愍子願師嗣拜儀同三司大
業初行新令五等並除未幾帝復下詔改封雍丘侯復

以願師襲

讚以寧勲建德初賜爵華陰縣侯累遷開府儀同大將軍進爵武陽郡公永恩少有職度與寧俱歸周文以迎孝武功封新興伯屢從征討皆有功進位驃騎大將軍開府儀同三司周孝閔帝踐阼授鄆州刺史改封沃野縣公保定元年入為司會中大夫寧封楚國公請以先封武陽郡三千戶益沃野之封詔許焉卒于官贈少保謚曰敬子通嗣

通字平東一名會弘厚有器局在周以父功賜爵臨貞
縣侯改封沃野縣公位開府北徐州刺史開皇初進爵
南陳郡公尚隋文帝妹昌樂縣長公主歷定相二州刺
史夏洪二州總管並以寬惠稱卒官謚曰安子寬嗣

楊紹字子安弘農華陰人也祖興魏新平郡守父國中
散大夫紹少慷慨有志略屢從征伐力戰有功普泰初
封平鄉縣男大統元年進爵冠軍縣公四年為郿城郡
守紹性恕直兼有威惠百姓安之累遷驃騎大將軍開

府儀同三司鄜州刺史賜姓叱呂引氏周孝閔帝踐祚
進爵儻城郡公位大將軍卒贈成文等八州刺史謚曰
信子雄嗣

雄初名惠美姿容有器度雍容閑雅進止可觀周武帝
時為太子司旅下大夫帝幸雲陽宮衛王直作亂襲肅
章門雄逆拒破之封武陽郡公遷右衛上大夫大象中
進爵邦國公隋文帝為丞相雍州牧畢王賢構作難雄
時為別駕知其謀以告文帝賢伏誅以功授柱國雍州

牧仍領相府虞候周宣帝葬備諸王有變令雄率六千騎送至陵所進位上柱國文帝受禪除左衛將軍兼宗正卿遷右衛大將軍參預朝政封廣平王以邳公別封一子雄請封弟士貴朝廷許之或奏高頔朋黨者帝言之於朝雄深明其虛帝亦以為然雄時貴寵冠絕一時與高頔虞慶則蘇威稱為四貴雄寬容下士朝野顧屬帝陰忌之不欲其典兵馬乃改授司空外示優崇而內實奪其權也雄乃閉門不通賓客尋改封清漳王仁壽

初帝以清漳不允聲望命職方進地圖指安德郡示羣臣曰此號足為名德相稱乃改封安德王大業初授太子太傅元德太子薨檢校鄭州刺史遷懷州刺史京兆尹帝親征吐谷渾詔雄總管澆河道諸軍及還改封觀王遼東之役檢校左翊衛大將軍出遼東道次瀘河鎮遘疾薨帝為之廢朝詔鴻臚監護喪事有司請謚曰懿帝曰王道高雅俗德冠生靈乃謚曰德贈司徒襄國等十郡太守子恭仁位吏部侍郎恭仁弟絺性和厚頗有

文學歷義州刺史淮南郡太守及父薨起為司隸校尉
遼東之役楊玄感反其弟玄縱自帝所逃赴其兄路逢
絀絀避人偶語久之司隸刺史劉休文奏之時恭仁將
兵於外帝寢其事絀憂發病而卒

雄弟達字士達有學行仕周位儀同內史下大夫封遂
寧縣男文帝受禪拜給事黃門侍郎進爵為子遷兼吏
部侍郎加開府轉內史侍郎鄴鄭趙三州刺史俱有能
名平陳後帝差品天下牧宰達為第一擢拜工部尚書

加上開府達為人弘厚有局度楊素每曰有君子貌兼君子心者唯楊達耳獻皇后及文帝山陵制度達並參預焉煬帝嗣位轉納言領營東都副監遼東之役領右武衛將軍進位左光祿大夫卒於師贈吏部尚書始安侯諡曰恭

王雅字度容閬熙新固人也少沉毅木訥寡言有膽勇善騎射周文聞其名召入軍以功賜爵居庸縣子從禽竇恭於潼關沙苑之戰雅謂所部曰彼軍殆有百萬今

我不滿萬人常理論之實難與敵但相公神武以順討
逆豈計衆寡大丈夫不以此時破賊何用生為乃擐甲
出戰所向披靡周文壯之又從戰芒山時大軍失利諸
將皆退雅獨拒之敵人見其無繼步騎競進雅左右奮
擊斬九級敵衆稍退雅乃還周文歎曰王雅舉身悉是
膽也進爵為伯累遷驃騎大將軍開府儀同三司明帝
初除汾州刺史勵精為政人庶悅附自遠至者七百餘
家卒於夏州刺史子世積嗣

世積容貌魁岸腰帶十圍風神爽拔有人傑之表在周以功拜上儀同封長子縣公隋文帝受禪進封宜陽郡公高頴美其才能甚善之嘗謂頴曰吾輩俱周臣子社稷淪沒若何頴深拒之未幾授蘄州總管平陳之役以舟師自蘄水趣九江以功進位柱國荊州總管後桂州人李光仕作亂世積以行軍總管討平之進位上柱國甚見隆重世積見帝性忌刻功臣多獲罪由是縱酒不與執政言及時事上以為有酒疾舍之宮內令醫者療

之世積詭稱疾愈始得就第及征遼東世積與漢王並
為行軍元帥至柳城遇疾而還拜涼州總管令騎士七
百人送之官未幾其親信安定皇甫孝諧有罪吏捕之
亡抵世積不納由是有憾孝諧竟配防桂州事總管令
狐熙熙又不禮焉甚困窮因徼幸上變稱世積嘗令道
人相其貴不道人云當為國主謂其妻曰夫人當為皇
后又將之涼州其所親謂世積曰河西天下精兵處可
圖大事世積曰涼州土曠人稀非用武國由是被徵案

其事有司奏左衛大將軍元旻右衛大將軍元胄左僕射高顯並與世積交通受其名馬之贈世積竟坐誅旻胄等免官拜孝諧為上大將軍

韓雄字木蘭河南東垣人也祖景孝文時為赭陽郡守雄少敢勇膂力絕人工騎射有將率材略及孝武西遷雄便慷慨有立功之志大統初遂與其屬六十餘人於洛西舉兵數日間眾至千人與河南行臺楊琚共為犄角每抄掠東魏所向剋獲東魏洛州刺史韓賢以狀聞

鄴乃遣其軍司慕容紹宗與賢合勢討雄戰數十合雄
衆略盡兄及妻子皆為賢所獲將以為戮乃遣人告雄
皆免之雄乃詣賢軍即隨賢還洛潛引賢黨謀欲襲之
事洩遁免謁周文於弘農封武陽縣侯遣還鄉里更圖
進取雄乃招集義衆從獨孤信入洛陽芒山之役周文
命雄邀齊神武於隘道神武怒命三軍并力取雄雄突
圍得免除東徐州刺史東魏雍州刺史郭叔略接境頗
為邊患雄密圖之輕將十騎夜入其境伏於道側遣都

督韓仕於略城服東魏人衣服詐若自河陽叛投關西者略出馳之雄自後射之再發咸中遂斬略首除河南尹進爵為公尋進驃騎大將軍開府儀同三司侍中河南邑中正周孝閔帝踐祚進爵新義郡公賜姓宇文氏明帝二年除都督中州刺史雄久在邊具知敵人虛實每率衆深入不避艱難前後經四十五戰雖時有勝負而雄志氣益壯東魏深憚之卒于鎮贈大將軍五州諸軍事謚曰威子禽嗣

禽字子通少慷慨以膽略稱容貌魁岸有雄傑之表性
又好書經史百家皆略知大旨周文見而異之令與諸
子遊集以軍功稍遷儀同三司襲爵新義郡公武帝伐
齊禽說下獨孤永業於金墉城及平范陽加上儀同永
州刺史隋文帝作相遷和州刺史陳將甄慶任蠻奴蕭
摩訶等共為聲援頻寇江北前後入界禽屢挫其鋒陳
人奪氣開皇初文帝潛有吞江南志拜禽廬州總管委
以平陳之任甚為敵人所憚及大舉伐陳以禽為先鋒

禽領五百人宵濟襲探石守者皆醉遂取之進攻姑熟
半日而拔次於新林江南父老素聞其威信來謁軍門
晝夜不絕其將樊巡魯世真田瑞等相繼降晉王遣行
軍總管杜彥與禽合軍陳叔寶遣領軍蔡徵守朱雀航
聞禽將至衆懼而潰任蠻奴為賀若弼所敗棄軍降禽
禽以精騎直入朱雀門陳人欲戰蠻奴撓之曰老夫尚
降諸君何事衆皆散走遂平金陵執陳主叔寶時賀若
弼亦有功乃下詔晉王曰此二公者朕本委之悉如朕

意以名臣之功成太平之業天下盛事何用過此又下
優詔於禽弼曰中國威於萬里宣朝化於一隅使東南
之人俱出湯火數百年賊旬日廓清專是公之功也高
名塞於宇宙盛業光於天壤逖聽前古罕聞其匹班師
凱入誠知非遠相思之甚寸陰若歲及至京弼與禽爭
功於上前弼曰臣在蔣山死戰破其銳卒禽其驍將震
揚威武遂平陳國禽略不交陣豈臣之比禽曰奉奉明
旨令臣與弼同取偽都弼乃敢先期逢賊遂戰致將士

傷死甚多臣以輕騎五百兵不血刃直取金陵降任蠻
奴執陳叔寶據其府庫傾其巢穴弼至夕方扣北掖門
臣啓關而納之斯乃救罪不暇安得與臣為比上曰二
將俱合上勲於是進位上柱國賜物八千段有司劾禽
縱士卒淫汙陳宮坐此不得國公及真食邑大軍之始
出也上敕有司曰亡國物我一不以入府可於苑內築
五塚當悉賜文武百官大射以取之及是上御玄堂大
陳陳之奴婢貨賄會王公文武官七品已上武職領兵

都督已上及諸考使以射之先是江東謠曰黃斑青驄
馬發自壽陽溪來時冬氣末去日春風始皆不知所謂
禽本名禽武平陳之際又乘青驄馬往返時節與歌相
應至是方悟後突厥來朝上謂曰汝聞江南有陳國天
子乎對曰聞之上命左右引突厥詣禽前曰此是執得
陳國天子者禽勵然顧之突厥惶恐不敢仰視其威容
如此別封壽光縣公真食千戶以行軍總管屯金城禦
備胡寇即拜涼州總管俄徵還京恩禮殊厚無何其隣

母見禽門下儀衛甚盛有同王者母異而問之其中人曰我来迎王忽不見又有人疾篤忽驚走至禽家曰我欲謁王左右問何王曰閻羅王禽子弟欲撻之禽止之曰生為上柱國死作閻羅王亦足矣因寢疾卒子世諤

嗣

世諤倜儻驍捷有父風楊玄感亂引為將每戰先登玄感敗為吏所拘時帝在高陽送詣行在所世諤日令守者市酒餼以酣暢揚言曰吾死在朝夕不醉何為漸以

酒進守者守者狎之遂飲令醉因得逃奔山賊不知所
終禽母弟僧壽字玄慶亦以勇烈知名周武帝時為侍
伯中旅下大夫隋文帝得政從韋孝寬平尉遲迥以功
授大將軍封昌樂縣公開皇初拜安州刺史時禽為廬
州總管朝廷不欲其兄弟同在淮南轉熊蔚二州刺史
進爵廣陵郡公尋以行軍總管擊破突厥於雞頭山後
坐事免數歲復拜蔚州刺史突厥甚憚之後檢校靈州
總管事從楊素破突厥進位上柱國改封江都郡公煬

帝即位封新蔡郡公自是不復任用大業五年從幸大
原時有京兆人達奚通妾王氏能清歌朝臣多相命觀
之僧壽亦預焉坐除名尋命復位卒於京師子孝基
僧壽弟洪字叔明少驍勇善騎射膂力過人仕周以軍
功拜大都督隋文帝為丞相從韋孝寬破尉遲迥加上
開府封甘棠縣侯及帝受禪進爵為公開皇九年平陳
之役授行軍總管及陳平晉王廣大獵於蔣山有猛獸
在園中衆皆懼洪馳馬射之應弦而倒陳氏諸將列觀

皆歎伏焉王大喜賜縑百匹尋以功加柱國拜蔣州刺史轉廬州時突厥屢為邊患朝廷以洪驍勇令檢校朔州總管事尋拜代州總管仁壽元年突厥達頭可汗犯塞洪率蔚州刺史劉隆大將軍李樂王拒之遇虜於恒安衆寡不敵洪四面搏戰身被重創將士沮氣虜悉衆圍之矢下如雨洪偽與虜和圍少懈洪率所領潰圍而出死者大半殺虜亦倍洪及藥王除名隆竟坐死煬帝北巡至恒安見白骨被野以問侍臣曰往者韓洪與虜

戰處也帝憫然傷之收葬骸骨命五郡沙門為設齋供
拜洪隴西太守未幾朱崖人王萬昌作亂詔洪平之以
功加金紫光祿大夫領郡如故俄而萬昌弟仲通復叛
又詔洪平之還師未幾旋遇疾卒

賀若敦河南洛陽人也其先居漠北世為部落大人曾
祖貸魏獻文時入國為都官尚書封安富縣公祖伏連
仕魏位雲州刺史父統勇健不好文學以祖蔭為祕書
郎永安初從太宰元天穆討邢杲以功封當亭子齊神

武初起以統為潁川長史執刺史田迅以州降拜兗州
刺史賜爵當亭縣公歷位北雍恒二州刺史卒贈司空
公謚曰哀敦少有氣幹統之將執田迅也慮事不果又
以累弱既多難以自救沈吟者久之敦年十七進策贊
成其謀統流涕從之遂定謀歸西時羣盜蜂起大龜山
賊張世顯潛來襲統敦挺身赴戰手斬七八人賊乃走
統大悅謂左右僚屬曰我少從軍旅戰陣非一如此兒
年時膽略未見其人非唯成我門戶亦當為國名將明

年從河內公獨孤信於洛陽被圍敦彎三石弓箭不虛
發信乃言於周文引至麾下授都督封安陵縣伯嘗從
校獵甘泉宮時圍人不齊獸多越逸周文大怒人皆股
戰圍內唯有一鹿俄亦突圍而走敦躍馬馳之鹿上東
山敦棄馬步逐至山半便乃掣之而下周文大悅諸將
因得免責累遷太子庶子廢帝二年拜右衛將軍俄加
驃騎大將軍開府儀同三司進爵廣鄉縣公時岷蜀初
開人情尚梗巴西人譙淹據南梁州與梁西江州刺史

王開業共為表裏扇動羣蠻周文令敦討平之進爵武
都郡公拜典祀中大夫尋為金州都督蠻帥向白彪向
五子王等聚眾為寇圍逼信州詔敦與開府田弘赴救
未至而城已陷乃進軍追討遂平信州是歲荊州蠻帥
文子榮自號仁州刺史復令敦與開府段韶討禽子榮
并虜其眾武成元年入為軍司馬陳將侯瑱侯安都等
圍逼湘州遏絕糧援乃令敦度江赴救敦連戰破瑱乘
勝遂次湘州俄而秋水汎溢江路遂斷糧援既絕恐瑱

等知其糧少乃於營內多為聚土覆之以米召側近村人陽有所訪問隨即遣之瑱等聞之良以為實敦又增修營壘造廬舍亦以持久湘羅之間遂廢農業瑱等無如之何初土人亟乘輕船載米粟及籠鷄鴨以餉瑱軍敦患之乃偽為土人裝船伏甲士於中瑱軍人望見謂餉船之至逆來爭取敦甲士遂禽之又敦軍數有叛人乘馬投瑱瑱輒納之敦又別取一馬牽以趣船令船中逆以鞭鞭之如是者再三馬便畏船不上後伏兵於江

岸使人乘畏船馬以招瑱軍詐云投附瑱便遣兵迎接
競來牽馬馬既畏船不上伏兵發盡殺之此後實有饋
餉及亡奔瑱者猶謂敦之詐並不敢受相持歲餘瑱等
不能制求借船送敦度江敦慮其詐或謂曰舍我百里
當為汝去瑱等遂留船於是將兵去津路百里敦覘之
非詐勒衆而還在軍病死者十五六晉公護以敦失地
無功除其名保定五年累遷中州刺史鎮孟谷敦恃功
負氣顧其流輩皆為大將軍敦獨未得兼以湘州之役

全軍而反翻被除名每出怨言晉公護怒徵還逼令自殺臨刑呼子弼謂曰吾必欲平江南然心不果汝當成吾志吾以舌死汝不可不思因引錐刺弼舌出血誠以慎口建德初追贈大將軍謚曰烈

弼字輔伯少有大志驍勇便弓馬解屬文博涉書記有重名周齊王憲聞而敬之引為記室封當亭縣公遷小內史與韋孝寬伐陳攻拔數十城弼計居多拜壽州刺史改封襄邑縣公隋文帝為丞相尉遲迥作亂帝恐弼

為變遣長孫平馳驛代之及帝受禪陰有平江南志訪
可任者高頴薦弼有文武才幹於是拜吳州總管委以
平陳事弼忻然以為已任與壽州總管源雄並為重鎮
弼遺雄詩曰交河驃騎幕合浦伏波營勿使騏驎上無
我二人名獻取陳十策上稱善賜以寶刀開皇九年大
舉伐陳以弼為行軍總管將度江酌酒呪曰弼親承廟
略遠振國威若使福善禍淫大軍利涉如事有乖違得
葬江魚腹中死且不恨先是弼請緣江防人每交代際

必集歷陽於是大列旗幟營幕被野陳人以為大兵至
悉發國中士馬既知防人交代其衆復散後以為常不
復設備及此弼以大軍濟江陳人弗覺襲陳南徐州拔
之執其刺史黃恪軍令嚴肅秋毫不犯有軍士於人間
酤酒者弼立斬之進屯蔣山之白土岡陳將魯廣達周
智安任蠻奴田瑞孔範蕭摩訶等以勁兵拒戰田瑞先
犯擊走之魯廣達等相繼遽進弼軍屢却弼揣知其驕
士卒且惰於是督厲將士殊死戰遂大破之麾下士開

府員明禽摩訶至弼命左右牽斬之摩訶顏色自若弼
釋而禮之從北掖門入時韓禽已執陳叔寶弼至呼叔
寶視之叔寶惶懼流汗股慄再拜弼謂曰小國之君當
大國卿拜禮也入朝不失作歸命侯無勞恐懼既而弼
恚恨不獲叔寶於是與禽相詢挺刃而出令蔡徵為叔
寶作降牋命乘騾車歸已事不果上聞弼有功大悅下
詔褒揚之晉王以弼先期決戰違軍命於是以弼屬吏
上驛召之及見迎勞曰剋定三吳公之功也命登御坐

賜物八千段加位上柱國進爵宗國公真食襄邑三千
戶加寶劔寶帶金甕金盤各一并雉尾扇曲蓋雜綵二
千段女樂二部又賜陳叔寶妹為妾拜右領軍大將軍
平陳後六年弼撰其書策上之謂為御授平陳七策上
弗省曰公欲發揚我名我不求名公宜自載家傳七策
其一請廣陵頓兵一萬番代往來陳人初見設備後以
為常及大兵南伐不復疑也其二使兵緣江時獵人馬
喧噪及兵臨江陳人以為獵也其三以老馬多買陳船

而匿之買弊船五六十艘於瀆內陳人覘以為內國無船其四積葦荻於楊子津其高蔽艦及大兵將度乃卒通瀆於江其五塗戰船以黃與枯荻同色故陳人不預覺之其六先取京口倉儲速據白土岡置兵死地故一戰而剋其七臣奉敕兵以義舉及平京口俘五千餘人便悉給糧勞遣付其敕書命別道宣喻是以大兵度江莫不草偃十七日之間南至林邑東至滄海西至象林皆悉平定轉右武侯大將軍弼時貴盛位望隆重其兄

隆為武都郡公弟東萬榮郡公並刺史列將弼家珍翫
不可勝計婢妾曳綺羅者數百時人榮之弼自謂功名
出朝臣之右每以宰相自許既而楊素為右僕射弼仍
為將軍甚不平形於言色由是免官弼怨望愈甚後數
載下弼獄上謂曰我以高顙楊素為宰相汝每昌言此
二人唯堪噉飯耳是何意也弼曰顙臣之故人素臣之
舅子臣並知其為人誠有此語公卿奏弼怨望罪當死
上曰臣下守法不移公可自求活理弼曰臣恃至尊威

靈將八千兵渡江即禽陳叔寶竊以此望活上曰此已格外酌賞何用追論弼曰平陳之日諸公議不許臣行推心為國已蒙格外重賞今還格外望活既而上低徊者數日惜其功特令除名歲餘復其爵位上亦忌之不復任使然每宴賜遇之甚厚十九年上幸仁壽宮讌王公詔弼為五言詩詞意憤怨帝覽而容之明年春弼又有罪在禁所詠詩自若上數之曰人有性善行惡者公之為惡乃與行俱有三太猛嫉妬心太猛自是非人心

太猛無上心太猛昔在周朝已教他兒子反此心終不能改邪他日上謂侍臣曰初欲平陳時弼謂高頔曰陳叔寶可平不作高鳥盡良弓藏邪頔云必不然平陳後便索內史又索僕射我語頔曰功臣正宜授勲官不可豫朝政弼後語頔皇太子於已出口入耳無所不盡公終久何必不得弼力何脉脉邪意圖鎮廣陵又求荊州總管並是作亂處意終不改也後突厥入朝上賜之射突厥一發中的上曰非弼無能當此乃命弼弼再拜呪

曰臣若赤誠奉國當一發破的如不然發不中也弼射一發而中上大悅顧謂突厥曰此人天賜我也煬帝之在東宮嘗謂曰楊素韓禽史萬歲三人俱良將也優劣如何弼曰楊素是猛將非謀將韓禽是鬪將非領將史萬歲是騎將非大將太子曰然則大將誰也弼拜曰唯殿下所擇弼意自許為大將及煬帝嗣位尤被疎忌大業三年從駕北巡至榆林時為大帳下可坐數千人召突厥啟人可汗饗之弼以為太侈與高頴宇文弼等私

議得失為人所告竟坐誅時年六十四妻子為官奴婢
羣從徙邊子懷亮慷慨有父風以柱國世子拜儀同三
司坐弼為奴俄亦誅死敦弟誼誼性剛果有幹略周文
據關中引之左右累遷儀同三司略陽公府長史周閔
帝受禪封霸城縣子加開府歷原信二州總管及兄敦
以讒毀伏誅坐免官從武帝平齊拜洛州刺史進封建
威縣侯開皇中位左武侯將軍海陵郡公後以突厥為
邊患誼素有威名拜靈州刺史進位柱國誼時年老猶

能重鎧上馬甚為北夷所憚數載上表乞骸骨卒於家
子舉襲爵

論曰周文帝屬禍亂之辰以征伐而定海內大則連兵
百萬繫之以存亡小則轉戰邊亭不闕於旬月是以兵
無少長士無賢愚莫不投筆要功橫戈請奮豆盧寧楊
紹王雅韓雄等或攀翼雲漢底績屯夷雖運移年代而
名成終始美矣哉豆盧勣譽宣分竹毓節見臨危可謂
載德象賢也觀德王位登台袞慶流後嗣保茲寵祿寔

仁厚之所致乎王世積雋才雖多適足為害者矣賀若
敦志略慷慨深入敵境勅寇絕其糧道江淮沮其歸塗
臨危而策出無方事迫而雄心彌厲故能利涉死地全
師以反而茂勲莫紀嚴刑已及天下是以知宇文護之
不能終其位也自南北分隔將三百年隋文爰應千齡
將一函夏賀若弼慷慨申必取之長策韓禽奮發賈餘
勇以爭先隋氏自此一戎威加四海稽諸天道或時有
廢興考之人謀實二臣之力其俶儻英略賀弼居多武

毅威雄韓禽稱重方於晉之王杜勲庸綽有餘地然賀
弼功成名立矜伐不已竟顛殞於非命亦不密以失身
若念父臨終之言必不及於斯禍韓禽累葉將家威聲
動俗敵國旣破名遂身全幸也廣陵甘棠咸有武藝驍
雄膽略並為當時所推赳赳干城難兄難弟矣

北史卷六十八

北史卷六十八考證

王雅傳時大軍失利諸將皆退雅獨拒之○失監本訛
未今改從周書

世積傳可圖大事○大監本訛太今改正

韓雄傳贈大將軍五州諸軍事○隋書官至大將軍洛
虞等八州刺史與此小異

禽傳禽字子通○禽陳書作擒

禽本名禽○隋書禽本名豹

世諤傳朝臣多相命觀之○命一本作會

賀若敦傳河南洛陽人也○河南一本作河陽

弼傳陳將魯廣達周智安任蠻奴田瑞孔範蕭摩訶等

○田瑞下隋書有樊毅二字

北史卷六十八考證

欽定四庫全書

史部

北史卷

六十九
七十

詳校官編修_臣裴謙

洗馬_臣王坦修覆勘

覆校官中書_臣呂雲棟

校對官監丞_臣張曾炳

謄錄舉人_臣楚惟榮

欽定四庫全書

北史卷六十九

唐

李

延

壽

撰

列傳第五十七

申徽

陸通

弟逞

庫狄峙

楊荐

王慶

趙剛

子仲卿

趙昶

王悅

趙文表

元定

楊樹

申徽字世儀魏郡人也六世祖鐘為後趙司徒冉閔末

中原喪亂鍾子邃避地江左曾祖爽仕宋位雄州刺史
祖隆道宋北兗州刺史父明仁郡功曹早卒徽少與母
居盡力孝養及長好經史性審慎不妄交遊遭母憂喪
畢乃歸於魏元顥入洛以元邃為東徐州刺史邃引徽
為主簿顥敗邃被檻車送洛陽故吏賓客並委去唯徽
送之及邃得逸乃廣集賓友歎徽有古人風尋除太尉
府行參軍孝武初徽以洛陽兵難未已邃間行入關見
周文周文與語奇之薦之於賀拔岳岳亦雅相敬待引

為賓客周文臨夏州以徽為記室參軍兼府主簿周文
察徽沉密有度量每事信委之乃為大行臺郎中時軍
國草創幕府務殷四方書檄皆徽之辭也以迎孝武功
封博平縣子本州大中正大統初進爵為侯四年拜中
書舍人修起居注河橋之役大軍不利近侍之官分散
者衆徽獨不離左右魏帝稱歎之十年遷給事黃門侍
郎先是東陽王元榮為瓜州刺史其女壻劉彥隨焉及
榮死瓜州首望表榮子康為刺史彥遂殺康而取其位

屬四方多難朝廷不遑問罪因授彥刺史頻徵不奉詔
又南通吐谷渾將圖叛逆周文難於動衆欲以權略致
之乃以徽為河西大使密令圖彥徽輕以五十騎行既
至止於賓館彥見徽單使不以為疑徽乃遣一人微勸
彥歸朝以揣其意彥不從徽又使贊成其住計彥便從
之遂來至館徽先與瓜州豪右密謀執彥遂叱而縛之
彥辭無罪徽數之曰君無尺寸之功濫居方岳之重恃
遠背誕不恭貢職戮辱使人輕忽詔命計君之咎實不

容誅但受詔之日本令相送歸闕所恨不得即申明罰
以謝邊遠耳於是宣詔慰勞吏人及彥所部復云大軍
續至城內無敢動者使還遷都官尚書十二年瓜州刺
史成慶為城人張保所殺都督令狐延等起義逐保啓
請刺史以徽信洽西土拜假節瓜州刺史徽在州五歲
儉約率下邊人樂而安之十六年徵兼尚書右僕射加
侍中驃騎大將軍開府儀同三司廢帝二年進爵為公
正右僕射賜姓宇文氏徽性勤至凡所居官案牘無大

小皆親自省覽以是事無稽滯吏不得為姦後雖歷公卿此志不懈出為襄州刺史時南方初附舊俗官人皆通餉遺徽性廉慎乃畫楊震像於寢室以自戒及代還人吏送者數十里不絕徽自以無德於人慨然懷愧因賦詩題於清水亭長幼聞之皆競來就讀遞相謂曰此是申使君手迹並寫誦之明帝以御正任總絲綸更崇其秩為上大夫負四人號大御正又以徽為之歷小司空少保出為荊州刺史入為小司徒小宗伯天和六年

上疏乞骸骨詔許之薨贈泗州刺史諡曰章子康嗣位
瀘州刺史司織下大夫上開府康弟敦汝南郡守敦弟
靜齊郡守靜弟處上開府同昌縣侯卒

陸通字仲明吳郡人也曾祖載從宋武帝平關中軍還
留載隨其子義真鎮長安遂沒赫連氏魏太武平赫連
氏載仕魏位中山郡守父政性至孝其母吳人好食魚
北土魚少政求之常苦難後宅側忽有泉出而有魚遂
得以供膳時人以為孝感所致因謂其泉為孝魚泉從

尒朱天光討伐及天光敗歸周文周文為行臺以政為
行臺左丞原州長史賜爵中都縣伯大統中卒通少敦
敏好學有志節幼從政在河西遂逢寇難與政相失通
乃自拔東歸從尒朱榮榮死又從尒朱兆及尒朱氏滅
乃入關周文時在夏州引為帳內督頃之賀拔岳為侯
莫陳悅所害時有傳岳軍府已亡散者周文憂之通以
為不然居數日間至果如所策自是愈見親禮遂晝夜
陪侍家人罕見其面通雖處機密愈自恭謹周文以此

重之後以迎孝武功封都昌縣伯大統元年進爵為侯
從禽竇泰復弘農沙苑之役力戰有功又從解洛陽圍
軍還屬趙青雀反於長安周文將討之以人馬疲弊不
可速行又謂青雀等一時陸梁不足為慮乃云我到長
安但輕騎臨之必當面縛通進曰青雀等既以大軍不
利謂朝廷傾危同惡相求遂成反亂然其逆謀久定必
無遷善之心且其詐言大軍敗績東寇將至若以輕騎
往百姓謂為信然更沮兆庶之望大兵雖疲弊精銳猶

多以明公之威率思歸之衆以順討逆何慮不平周文
深納之因從平青雀錄前後功進爵為公徐州刺史以
寇難未平留不之部與于謹討劉平伏加大都督從周
文拔玉壁進儀同三司九年高仲密以地求附通從若
干惠戰於芒山衆軍皆退唯惠與通率所部力戰至夜
中乃陰引還敵亦不敢逼進授驃騎大將軍開府儀同
三司太僕卿賜姓部六孤氏進爵綏德郡公周孝閔踐
阼拜小司空保定五年累遷大司寇通性柔謹雖久處

列位常清慎自守所得祿賜盡與親故共之家無餘財
常曰凡人患貧而不貴不患貴而不貧也建德元年轉
大司馬其年薨通弟逞

逞字李明初名彥字世雄魏文帝常從容謂之曰爾既
溫裕何因乃字世雄且為世之雄非所宜也於爾兄弟
又復不類遂改焉逞少謹密早有名譽兄通先以軍功
別受茅土乃讓父爵中都縣伯令逞襲之起家羽林監
周文內親信時輩皆以驍勇自達唯逞獨兼文雅周文

由此加禮遇焉大統十四年參大丞相府軍事尋兼記
室保定初累遷吏部中大夫歷蕃部御伯中大夫進驃
騎大將軍開府儀同三司徙授司宗中大夫轉軍司馬
逞幹識詳明歷任三府所在著績朝廷嘉之進爵為公
天和三年齊遣侍中斛斯文略中書侍郎劉逖來聘初
脩隣好盛選行人詔逞為使主尹公正為副以報之逞
美容止善辭令敏而有禮齊人稱焉還屆近畿詔令路
車儀服郊迎而入時人榮之四年除京兆尹郡界有豕

生數子經旬而死其家又有積遂乳養之諸豚賴之以活時論以逞仁政所致俄遷司會中大夫出為河州刺史晉公護雅重其才表為中外府司馬頗委任之尋復為司會兼納言遷小司馬及護誅坐免官頃之起為納言又以疾不堪劇任及除宜州刺史故事刺史奉辭例備鹵簿逞以時屬農要奏請停之武帝深嘉焉詔遂其所請以彰雅操逞在州有惠政吏人稱之東宮初建授太子太保卒贈大將軍子操嗣

庫狄峙其先遼東人本姓段匹磾之後也因避難改焉
後徙居代世為豪右祖凌武威郡守父貞上洛郡守峙
少以弘厚知名善騎射有謀略仕魏位高陽郡守政存
仁恕百姓頗悅之孝武西遷峙乃棄官從入關大統元
年拜中書舍人參掌機密以恭謹見稱遷黃門侍郎時
與東魏爭衡蠕蠕乘虛屢為邊患朝議欲結和親乃使
峙往峙狀貌魁梧善於辭令蠕蠕主雅信重之自是不
復為寇周文謂峙曰昔魏絳和戎見稱前史以君方之

彼有愧色封高邑縣公累遷驃騎將軍開府儀同三司
拜侍中蠕蠕滅後突厥強盛雖與周通好而外連齊氏
周文又令峙銜命喻之突厥感悟即執齊使歸諸京師
進爵安豐郡公歷小司空小司寇明帝初為益州刺史
都督三十一州諸軍事峙性寬和尚清靖為夷獠所安
後為宜州刺史入為少師以年老乞骸骨詔許之卒諡
曰定子嶷嗣少知名位開府儀同三司職方中大夫蔡
州刺史卒官嶷弟徵從平齊以功拜儀同大將軍賜爵

樂陵縣公徽弟徽亦以軍功至儀同大將軍保城縣男
徽弟欽性弘厚有局度以齊右下大夫從武帝東伐入
并州軍敗侍臣殲焉及帝之出唯欽侍從以功授上儀
同大將軍遷開府歷右宮伯賜爵樂城縣侯仕隋位至
戶部尚書

楊荐字承略秦郡寧夷人也父寶昌平郡守荐幼孤早
有名譽性廉謹喜怒不形於色魏永安中隋尨朱天光
入關討羣賊封高邑縣男周文臨夏州補帳內都督及

平侯莫陳悅使荐入洛請事孝武授周文關西大行臺
仍除荐直閣將軍時馮翊長公主嫠居孝武意欲歸諸
周文乃令武衛元毗喻旨荐歸白周文又遣荐入洛陽
請之孝武即許焉孝武欲向關中荐贊成其計孝武曰
卿歸語行臺迎我周文又遣荐與長史宇文測出關候
接孝武至長安進爵清水縣子大統元年蠕蠕請和親
周文遣荐與楊寬使並結婚而還進爵為侯又使荐納
幣於蠕蠕魏文帝郁久閭后崩周文遣僕射趙善使蠕

蠕更請婚善至夏州聞蠕蠕貳於東魏欲執使者善懼
乃還周文乃使荐往賜黃金十斤雜綵三百匹荐至蠕
蠕責其背惠食言並論結婚之意蠕蠕感悟乃遣使隨
荐報命焉及侯景來附周文令荐助鎮遏荐知景翻復
遂求還具陳事實周文乃遣使密追助景之兵尋而景
叛十六年大軍東討周文恐蠕蠕乘虛寇掠乃遣荐往
更論和好以安慰之進使持節驃騎大將軍開府儀同
三司加侍中周孝閔帝踐阼除御伯大夫進爵姚谷縣

公仍使突厥結婚突厥可汗弟地頭可汗阿使郝庫頭
居東面與齊通和說其兄欲背先約計謀已定將以荐
等送齊荐知其意乃正色責之辭氣慷慨涕泗橫流可
汗慘然良久曰幸無所疑當共平東賊然後發遣我女
乃令荐先報命仍請東討以奉使稱旨遷大將軍保定
四年又納幣於突厥還行小司馬又行大司徒從陳公
純等送女於突厥進爵南安郡公天和三年遷總管梁
州刺史後以疾卒

王慶字興慶太原祁人也父因魏靈州刺史懷德縣公慶少開悟有才略初從周文征伐復弘農破沙苑並有戰功每獲殊賞大統十年授殿中將軍周孝閔帝踐阼晉公護引為典籤慶樞機明辯漸見親待授大都督武成元年以前後功賜爵始安縣男二年行小賓部保定二年使吐谷渾與其分疆仍論和好之事渾主悅服遣所親隨慶貢獻初突厥與周和親許納女為后而齊人知之懼成合從之勢亦遣使求婚財饋甚厚突厥貪其

重賂便許之朝議以魏氏昔與蠕蠕結婚遂為齊人離貳今者復恐改變欲遣使結之遂授慶左武伯副楊荐為使是歲遂興入并之役慶乃引突厥騎與隋公楊忠至太原而還及齊人許送皇姑及世母朝廷遂與通和突厥聞之復致疑阻於是又遣慶往諭之可汗感悅結好如初五年復與宇文貴使突厥送女自此以慶信著北蕃頻歲出使後更至突厥屬其可汗暴殂突厥謂慶曰前後使來逢我國喪者皆斃面表哀況今二國和親

豈得不行此事慶抗辭不從突厥見其守正卒不敢逼武帝聞而嘉之錄慶前後使功遷開府儀同三司兵部中大夫進爵為公歷丹中二州刺史為政嚴肅吏不敢犯大象元年授小司徒加上大將軍總管汾石二州五鎮諸軍事汾州刺史又除延州總管進位柱國開皇元年進爵平昌郡公卒于鎮贈上柱國諡曰莊子淹嗣趙剛字僧慶河南洛陽人也祖寧魏高平太守父和太平中陵江將軍南討度淮聞父喪輒還所司將致之於

法和曰罔極之恩終天莫報若許安厝禮畢而即罪戮死且無恨言訖號慟悲感傍人主司以聞遂宥之喪畢除寧遠將軍大統初追贈膠州刺史剛少機辯有幹能起家奉朝請累遷金紫光祿大夫領司徒府從事中郎加閣內都督及孝武與齊神武構隙剛密奉旨召東荊州刺史馮景昭未及發而神武已逼洛陽孝武西遷景昭集府僚文武議其去就司馬馮道和請據州待北方處分剛抽刀投地曰公若為忠臣可斬道和如欲從賊

可見殺景昭感悟遂率衆赴關右屬侯景逼穰城東荊州人楊歡等起兵應景以其衆邀景昭於路景昭戰敗剛遂沒於蠻後自贖免乃見東魏東荊州刺史李魔憐勸令歸關西魔憐納之使剛至并州密觀事勢神武引剛內宴因令剛賫書申勅荊州剛還報魔憐仍說魔憐斬楊歡等以州歸西魔憐乃使剛入朝大統初剛於灊上見周文具陳關東情實周文嘉之封陽邑縣子論復東荊州功進爵臨汝縣伯初賀拔勝獨孤信以孝武西

遷之後並流寓江左至是剛言於魏文帝請追而復之
乃以剛為兼給事黃門侍郎使梁魏興賁移書與其梁
州刺史杜懷瑤等即與剛盟軟受移送建康仍遣人隨
剛報命是年又詔剛使三荆聽在所便宜從事使還稱
旨進爵武成縣侯除大丞相府帳內都督復使魏興重
申前命尋而梁人禮送賀拔勝獨孤信等頃之御史中
尉董紹進策請圖梁漢以紹為行臺梁州刺史剛以為
不可而朝議已決遂出軍紹竟無功還免為庶人除剛

潁州郡守高仲密以北豫州來附兼大行臺左丞持節
赴潁川節度義軍師還剛別破侯景前驅於南陸復獲
其郡守二人時有流言傳剛東叛神武因設反間聲遣
迎接剛乃率騎襲其丁塢拔之周文知剛無貳乃加賚
焉除營州刺史進爵為公渭州人鄭五醜構逆與叛羗
傍乞鐵忽相應令剛往鎮之將發魏文帝引見內寢舉
觴屬剛曰昔侯景在東為卿所困黠羗小醜豈足勞卿
謀慮也時五醜已尅定夷鎮所在立柵剛至並攻破之

散其黨與五醜於是西奔鐵忽剛又進破鐵忽偽廣寧
郡守宇文貴等西討詔以剛行渭州事資給糧餼加驃
騎大將軍開府儀同三司入為光祿卿六官建拜膳部
中大夫周孝閔帝踐阼進爵浮陽郡公出為利州總管
沙州氏恃險送命剛再討復之方州生獠自此始從賦
役剛以信州濱江負阻乃表請討之詔剛率利沙等十
四州兵往經略焉仍加授渠州刺史剛初至渠帥憚其
軍威相次降款剛師出踰年士卒疲弊尋復亡叛後遂

以無功而還又與所部儀同尹才失和被徵赴關遇疾卒於路贈中浙涿三州刺史諡曰成子元卿弟仲卿

仲卿性麤暴有旅力周齊王憲甚禮之以軍功位上儀同為畿伯中大夫後以平王謙功進位大將軍封長垣縣公隋文帝受禪進河北郡公尋拜石州刺史法令嚴猛纖介之失無所寬捨鞭笞輒至二百吏人戰慄無敢違犯盜賊屏息皆稱其能遷朔州總管時塞北盛興屯田仲卿總統之徵有不理者仲卿輒召主掌撻其胸背

或解衣倒曳於荊棘中時人謂之於菟事多克濟由是
收獲歲廣邊戍無餽運之憂會突厥啓人可汗求婚上
許之仲卿因是間其骨肉遂相攻擊十七年啓人窘迫
與隋使長孫晟投通漢鎮仲卿率騎千餘援之達頭不
敢逼潛遣人誘致啓人所部至者二萬餘家其年從高
頴指白道以擊達頭仲卿為前鋒至族蠡山與虜遇交
戰七日大破之追奔至乞伏洎復啓人突厥悉衆而至
仲卿為方陣四面拒戰經五日會高頴大兵至合擊之

虜乃敗走追度白道踰秦山七百餘里時突厥降者萬餘家上令仲卿處之恒安以功進上柱國朝廷慮達頭掩襲啓人令仲卿屯兵二萬以備之代州總管韓洪永康公李藥王蔚州刺史劉隆等將步騎一萬鎮恒安達頭來寇韓洪軍大敗仲卿自樂寧鎮邀擊斬千餘級明年督役築金河定襄二城以居啓人時有上表言仲卿酷暴上命御史王偉按之並實惜其功不罪因勞之曰知公清正為下所惡賜物五百段仲卿益恣由是免官

仁壽初檢校司農卿蜀王秀之得罪奉詔往益州按之
秀賓客經過處仲卿必深文致法州縣長吏坐者大半
上以為能賞奴婢三十口黃金二百兩米粟五千石奇
瑤雜物稱是煬帝嗣位判兵部工部二尚書事卒官謚
曰肅子世弘嗣

趙昶字長舒天水南安人也曾祖襄仕魏至中山郡守
因家於代焉昶少聰敏有志節弱冠以材力聞魏北中
郎將高子鎮陝以昶為長史中軍都督周文平弘農擢

為相府典籤大統九年大軍失律於芒山清水氐酋李
鼠仁自軍逃還憑險作亂周文將討之先求可使者遂
令昶使焉見鼠仁喻以禍福羣酋或從或不從其命者
復將加刃於昶而昶神色自若志氣彌厲鼠仁感悟遂
相率降氐梁道顯叛攻南田周文復遣昶慰喻之道顯
等皆即款附東秦州刺史魏光因徙其豪帥三十餘人
并部落於華州周文即以昶為都督領之先是汾州胡
叛再遣昶慰勞之皆知其虛實及大軍往討昶為先驅

遂破之以功封章武縣伯十五年拜安夷郡守帶長蛇
鎮將氏俗荒獷昶威懷以禮莫不悅服期歲之後樂從
軍者千餘人加授帥都督時屬軍機科發切急氏情難
支復相率謀叛昶又潛遣誘說離間其情因其携貳遂
輕往臨之羣氏不知所為咸來見昶乃收其首逆者二
十餘人斬之餘衆遂定朝廷嘉之除大都督行南秦州
事時氏帥蓋闇等反昶復討平之又與史寧破宕昌羌
獠二十餘萬拜武州刺史恭帝初加驃騎大將軍開府

儀同三司潭水羗叛殺武陵潭水二郡守昶率儀同駱
天人等討平之周明帝初鳳州人仇周貢魏興等反自
號周公破廣化郡攻沒諸縣分兵西入圍廣業脩城二
郡廣業郡守薛瑱脩城郡守杜果等請昶為援遣使報
果為周貢黨樊伏興等所獲興等知昶將至解脩城圍
據泥功嶺設六伏以待昶昶至遂遇其伏合戰破之廣
業之圍亦解昶追之至泥陽川而還興州人段吒及氏
酋羗多復反攻昶郡縣昶討斬之昶自以被拔擢居將

帥之任傾心下士虜獲氏羗撫而使之皆為袒盡力周
文常曰不煩國家士馬而能威服氏羗者趙昶有之矣
至是明帝錄前後功進爵長道郡公賜姓宇文氏賞勞
甚厚二年徵拜兵部中大夫行吏部尋以疾卒

王悅字衆喜京兆藍田人也少有氣幹為州里所稱周
文初定關隴悅率募鄉里從軍屢有戰功大統元年除
相府刑獄參軍封藍田縣伯四年東魏將侯景攻圍洛
陽周文赴援悅又率鄉里千餘人從軍至洛陽將戰之

夕悅罄其行資市牛饗戰士悅所部盡力斬獲居多遷
大行臺右丞轉左丞久居管轄頗獲時譽三年侯景據
河南來附仍請兵為援周文先遣韋法保賀蘭願德等
帥衆助之悅言於周文曰侯景之於高歡始則篤鄉黨
之情末乃定君臣之契位居上將職重台司論其分義
有同魚水今歡始死景便離貳豈不知君臣之道有違
忠義之禮不足蓋其圖既大不卹小嫌然尚能背德於
高氏豈肯盡節於朝廷今若益之以勢援之以兵非唯

侯景不為池中之物亦恐朝廷貽笑將來也周文納之
乃遣追法保等而景尋叛後拜京兆郡守散騎常侍遷
大行臺尚書從達奚武征梁漢軍出武令悅說其城主
楊賢悅乃貽之書賢於是遂降悅又白武云白馬衝要
是必爭之地今城守寡弱易可圖也若蜀兵更至攻之
實難武然之即令悅率輕騎徑趣白馬悅示其禍福梁
將深悟遂以城降時梁武陵王蕭紀果遣其將任珍奇
欲先據白馬行次闕城聞其已降乃還及梁州平周文

即以悅行刺史事招攜初附人吏安之廢帝二年徵還
本任屬改行臺為中外府尚書負廢悅以儀同領兵還
鄉里悅既久居顯職及此之還私懷怏怏猶陵駕鄉里
失於宗黨之情其長子康恃悅舊望遂自驕縱所部軍
人將有婚禮康乃非理陵辱軍人訴之悅及康並坐除
名仍配遠防及于謹伐江陵令悅從軍展効江陵平因
留鎮之周孝閔帝踐阼依例復官授郢州刺史尋拜使
持節驃騎大將軍開府儀同三司大都督司水中大夫

進爵藍田縣侯俄遷司憲中大夫賜姓宇文氏又進爵河北縣公性儉約不營生業雖出內榮顯家徒四壁而已明帝手敕勞勉之保定元年卒於位子康嗣位至司邑下大夫

趙文表其先天水西人也後徙居南鄭累世為二千石父珏性方嚴有度量位

闕

伯中大夫封昌國縣伯贈虞

絳二州刺史諡曰貞文表少而脩謹志存忠節起家為周文親信累遷左金紫光祿大夫保定五年授畿伯下

大夫遷許國公宇文貴府長史尋拜車騎大將軍儀同
三司仍從貴使突厥迎皇后進止儀注皆令文表典之
文表斟酌而行皆合禮度及皇后將入境突厥託以馬
瘦徐行文表慮其為變遂說突厥使羅莫緣曰后自發
彼蕃已淹時序途經沙漠人馬疲勞且東寇每伺間隙
吐谷渾亦能為變今君以可汗愛女結姻上國曾無防
慮豈人臣之體乎莫緣然之遂倍道兼行數日至甘州
以迎后功別封伯陽縣伯天和三年除梁州總管府長

史所管地名恒稜者方數百里並夷獠所居恃其險固
常懷不軌文表率衆討平之遷蓬州刺史政尚仁恕夷
獠懷之加驃騎大將軍開府儀同三司又加大將軍進
爵為公大象中拜吳州總管時開府毛顗為吳州刺史
及隋文帝執政尉遲迥等舉兵遠近騷然人懷異望顗
自以秩大且為國家肺腑懼文表負已謀欲先之乃稱
疾不出文表徃問之顗遂手刃文表因令其吏人告云
文表謀反仍馳啓其狀帝以諸方未定恐顗為變遂授

顥吳州總管以安之後知文表無異志雖不罪顥而聽其子仁海襲爵

元定字願安河南洛陽人也祖比魏婺州刺史父道龍鉅鹿郡守定惇厚少言內沈審而外剛毅從周文討侯莫陳悅以功拜步兵校尉孝武西遷封高邑縣男定有勇略累從征伐每戰必陷陣然未嘗自言其功周文深重之諸將亦稱其長者累加驃騎大將軍開府儀同三司進爵為公廢帝二年以宗室進封建城郡王三年行

周禮爵隨例降改封長湖郡公周明帝初拜岷州刺史
威恩兼濟甚得羌豪之情先時生羌據險不賓者至並
出山谷從征賦焉及定代還羌豪等咸戀慕之保定中
授左宮伯中大夫久之轉左武伯中大夫進位大將軍
天和二年陳湘州刺史華皎舉州歸梁梁王欲因其隙
更圖攻取乃遣使請兵詔定從衛公直率衆赴之梁人
與華皎皆為水軍定為陸軍直總督之俱至夏口而陳
郢州堅守不下直令定圍之陳遣其將淳于量徐度吳

明徹等水陸來拒皎為陳人所敗直得脫身歸梁定既孤軍縣隔進退無路陳人乘勝水陸逼之定乃率所部斫竹開路且戰欲趣湘州而湘州已陷徐度等知定窮迫遣使偽與定通和重為盟誓許放還國定疑其詭詐欲力戰死之而定長史長孫隆及諸將等多勸定和定乃許之於是與度等刑牲歃血解仗就船為度所執所部衆軍亦被囚虜送詣丹陽居數月憂憤發病卒子樂楊擲字顯進正平高涼人也祖貴父猛並為縣令擲少

豪俠有志氣魏孝昌中尔朱榮殺害朝士大司馬城陽王元徽逃難投擲藏而免之孝莊帝立徽乃出復為司馬由是擢以義烈聞擢拜伏波將軍給事中元顥入洛孝莊北度太行及尔朱榮奉帝南討至馬渚擲乃具船以濟王師顥平封肥如縣伯加鎮遠將軍步兵校尉行濟北郡事進都督平東將軍大中大夫從孝武入關進爵為侯加撫軍將軍銀青光祿大夫時東魏遷鄴周文欲知其所為乃遣擲間行詣鄴以觀察之使還稱旨

授通直散騎常侍車騎將軍稽胡恃險不賓屢行鈔竊以擣兼黃門侍郎往慰撫之擣頗有權略能得邊情誘化酋渠多來款附乃有隨擣入朝者時弘農為東魏守擣從周文攻拔之然自河以北猶附東魏擣父猛先為邵郡白水令擣與其豪右相知請微行詣邵郡舉兵以應朝廷周文許之擣遂行與土豪王覆憐等陰謀舉事密相應會內外俱發遂拔郡禽守程保及縣令四人並斬之衆議推擣行郡事擣以因覆憐成事遂表覆憐為

邵郡守以功授大行臺左丞仍率義徒更為經略於是遣謀人誘說東魏城堡旬月之間正平河北南汾二絳建州大寧等諸城並有請為內應者大軍因攻而拔之以擿行正平郡事左丞如故齊神武敗於沙苑其將韓軌潘樂可朱渾元等為殿擿分兵要截殺傷甚衆東雍州刺史司馬恭懼擿威聲棄城遁走擿遂移據東雍州周文以擿有謀略堪委邊任乃表行建州事時建州遠在敵境然擿威恩夙著所經之處多羸糧附之比至建

州衆已一萬東魏州刺史車折於洛出兵遂戰擣擊敗之又破其行臺斛律俱於州西大獲甲杖及軍資以給義士由是威名大振東魏遣太保尉景攻陷正平復遣行臺薛脩義與斛律俱相會於是敵衆漸盛擣以孤軍無援且腹背受敵謀欲拔還復恐義徒背叛遂偽為周文書遣人若從外送來者云已遣軍四道赴援因令人漏泄使所在知之又分土人義酋令各領所部四出抄掠擬供軍費擣分遣訖遂於夜中拔還邵郡朝廷嘉其權

以全軍即授建州刺史時東魏以正平為東雍州遣薛
榮祖鎮之乃先遣奇兵急攻汾橋榮祖果盡出城中戰
士於汾橋拒守其夜擲從他道濟遂襲剋之進驃騎將
軍邵郡人以郡東叛郡守郭武安脫身走免擲又率兵
攻而復之轉正平郡守又擊破東魏南絳郡虜其郡守
屈僧珍錄前後功封邵陽縣伯芒山之戰擲攻拔柏谷
塢因即鎮之及大軍不利擲亦拔還而東魏將侯景率
騎追擲擲與儀同韋法保同心抗禦且戰且前景乃引

退周文嘉之復授建州刺史鎮車箱櫛久從軍役未及
葬父至是表請遷葬詔贈其父車騎大將軍儀同三司
晉州刺史贈其母夏陽縣君並給儀衛州里榮之及齊
神武圍玉壁別令侯景趣齊子嶺櫛恐入寇邵郡率騎
禦之景遠聞櫛至斫木斷路者六十餘里猶驚而不安
遂退還河陽其見憚如此十二年進授大都督加晉建
二州諸軍事又攻破蓼塢獲東魏將李顯進儀同三司
尋加開府復鎮邵郡十六年大軍東討授大行臺尚書

率義衆先驅敵境攻其四戍拔之時以齊軍不出乃追
擿還改封華陽縣侯又於邵郡置邵州以擿為刺史率
所部兵鎮之保定四年遷少師其年大軍圍洛陽詔擿
出軹關然擿自鎮東境二十餘年數與齊人戰每常克
獲以此遂有輕敵之心時洛陽未下而擿深入敵境又
不設備齊人奄至大破擿軍擿以衆敗遂降於齊擿之
立勲也有慷慨壯烈之志及軍敗遂就虜以求苟免時
論以此鄙之朝廷猶錄其功不以為罪令其子襲爵

論曰申徽局量深沉文之以經史陸通鑒悟明敏飾之以溫恭並夙奉龍顏早蒙任遇效宣提戟功預披荆義結周旋恩生契濶遂得入居端揆出撫列藩雖以識用成名抑亦情兼惟舊陸遲於戎旅之際以文雅見知出境播延譽之能莅官著從政之美歷居顯要豈徒然哉庫狄峙建和戎之功楊荐成入關之策趙剛之克剪凶狡趙昶之懷服氐羗王悅之料侯景文表之譎突厥或明稱先覺或識表見機觀其立功立事皆一時志力之

士也元定敗亡同黃權之無路楊欒攻勝亦兵破而身
囚功名寥落良可嗟矣易曰師出以律否臧凶傳曰不
備不虞不可以師其欒之謂也

北史卷六十九

北史卷六十九考證

申徽傳案牘無大小皆親自省覽○大監本訛太今改正

陸通傳遂逢寇難與政相失○政通之父也與監本訛明今改從隋書

趙剛傳剛密奉旨召東荊州刺史馮景昭○召監本訛石今改從南本

仲卿傳仲卿必深文致法○監本缺卿字今從南本增

入

趙昶傳喻以禍福羣酋或從或不從其命者復將加刃於昶○首監本訛酉今從南本改正

王悅傳始則篤鄉黨之情末乃定君臣之契○末監本訛未今改從南本

史臣論出境播延譽之能莅官著從政之美○官監本訛官今改從南本

北史卷六十九考證

欽定四庫全書

北史卷七十

唐 李 延 壽 撰

列傳第五十八

韓褒

趙肅

子軌

張軌

李彥

郭彥

梁昕

皇甫璠

子誕

辛慶之

族子昂

王子直

杜杲

呂思禮

徐招

檀翥

孟信

宗慄

劉璠

子祥
兄子行本

柳遐 子靖 莊

韓褒字弘業潁川潁陽人也祖瓌魏平涼郡守安定郡公父演恒州刺史褒少有志尚好學而不守章句其師恠問之對曰文字之間常奉訓誘至於商較異同請從所好師因此竒之及長涉獵經史深沉有遠畧屬魏室喪亂避地夏州時周文帝為刺史素聞其名待以客禮及賀拔岳為侯莫陳悅所害諸將遣使迎周文周文問以去留之計褒曰此天授也何可疑乎周文納焉及為

丞相引為錄事參軍賜姓侯呂陵氏大統初遷行臺左丞賜爵三水縣伯丞相府從事中郎出鎮浙鄺居二年徵拜丞相府司馬進爵為侯出為北雍州刺史州帶北山多有盜賊裒密訪之並豪右所為也而陽不之知厚加禮遇謂曰刺史起自書生安知督盜所賴卿等共分其憂耳乃悉召傑黠少年素為鄉里患者置為主帥分其地界有盜發而不獲者以故縱論於是諸被署者莫不惶懼皆首伏曰前盜發者並某等為之所有徒侶皆

列其姓名或亡命隱匿者亦悉言其所在褻乃取盜名簿藏之因大勝州門曰自知行盜者可急來首即除其罪盡今月不首者顯戮其身籍沒妻子以賞前首者旬日之間諸盜咸悉首盡褻取名簿勘之一無差異並原其罪許以自新由是羣盜屏息入為給事黃門侍郎遷侍中除都督西涼州刺史羌胡之俗輕貧弱尚豪富豪富之家侵漁百姓同於僕隸故貧者日削豪者益富褻乃悉募貧人以充兵士優復其家蠲免徭賦又調富人

財物以振給之每西域商貨至又先盡貧者市之於是
貧富漸均戶口殷實廢帝元年為會州刺史後以驃騎
大將軍開府儀同三司進爵為公累遷汾州刺史先是
齊寇數入人廢耕桑前後刺史莫能防扞褒至適會寇
來乃不下屬縣人既不備以故多被抄掠齊人喜於不
覺以為州先未集兵今還必不能追躡由是益懈不為
營壘褒已先勒精銳伏北山中分據險阻邀其歸路乘
其衆怠縱伏擊之盡復其衆故事獲生口者並送京師

褒因是奏曰所獲賊衆不足為多俘而辱之但益其忿耳請一切放還以德報怨有詔許焉自此抄兵頗息遷河州總管仍轉鳳州刺史尋以年老請致事詔許之天和五年拜少保褒歷事三帝以忠厚見知武帝深相敬重常以師道處之每入朝見必有詔令坐然後論政事卒贈涇岐燕三州刺史諡曰貞子繼伯嗣仕隋位終衛尉少卿

趙肅字慶雍河南洛陽人也世仕河西及沮渠氏滅曾

祖武始歸於魏賜爵金城侯祖興中書博士父申侯舉秀才為後軍府主簿肅早有操行知名於時孝昌中起家殿中侍御史累遷左將軍大中大夫東魏天平初除新安郡守秩滿還洛陽大統三年獨孤信東討肅率宗人為鄉導授司州別駕監督糧儲軍用不匱周文帝聞之謂人曰趙肅可謂洛陽主人也九年行華山郡事十三年除廷尉卿明年元日當行朝禮非有封爵者不得預焉肅時未有茅土左僕射長孫儉啓周文請之周文

乃召肅謂曰歲初行禮豈得使卿不預然何為不早言也於是令肅自選封名肅曰河清乃太平之應竊所願也於是封清河縣子十六年除廷尉卿加征東將軍肅久在理官執心平允凡所處斷咸得其情廉慎自居不營產業時人以此稱之十七年進位車騎大將軍儀同三司散騎常侍賜姓乙弗氏先是周文命肅撰法律肅積思累年遂感心疾去職卒家子軌

軌少好學有行檢周蔡王引為記室以清苦聞隋文帝

受禪為齊州別駕有能名其東鄰有桑甚落其家軌遣人悉拾還其主戒其諸子曰吾非以此求名意者非機杼物不願侵人汝等宜以為戒在州考績連最持節使者郃陽公梁子恭上狀文帝賜以米帛甚優令入朝父老將送者各揮涕曰別駕在官水火不與百姓交是以不敢以盃酒相送公清如水請酌一盃水奉餞軌受飲之至京詔與牛弘撰定律令格式時衛王爽為原州總管召為司馬在道夜行其左右馬逸入田中暴人禾軌

駐馬待明訪知禾主酬直而去原州人吏聞之莫不改操後檢校硤州刺史甚有恩惠轉壽州總管長史芍陂舊有五門堰蕪穢不通軌勸課吏人更開三十六門灌田五千餘頃人賴其利秩滿歸卒于家子弘安弘智並知名

張軌字元軌濟北臨邑人也父崇高平令軌少好學志識開朗初在洛陽家貧與樂安孫樹仁為莫逆之交每易衣而出以此見稱軌常謂所親曰奉雍之間必有王

者尔朱榮敗後遂杖策入朝賀拔恒以軌為記室參軍
典機密尋轉倉曹時穀糴踊貴或有請貸官倉者軌曰
以私害公非吾宿志濟人之難詎得相忘遂賣所服衣
物糴粟以振其乏及岳被害周文帝以軌為都督從征
侯莫陳悅悅平使於洛陽見領軍斛斯椿椿曰高歡逆
謀已傳行路人情西望以日為年未知宇文何如賀拔
也軌曰宇文公文足經國武足定亂至於高識遠度非
愚管所測椿曰誠如卿言真可恃也周文為行臺授軌

郎中孝武西遷除中書舍人封壽張縣子兼著作佐郎
修起居注遷給事黃門侍郎兼吏部郎中出為河北郡
守在郡三年聲績甚著臨人政術有循吏之美大統間
言宰人者多推尚之入為丞相府從事中郎行武功郡
事章武公導出鎮秦州以軌為長史廢帝元年進車騎
大將軍儀同三司散騎常侍二年賜姓宇文氏行南秦
州事恭帝二年徵拜度支尚書復除隴右府長史卒於
位諡曰質軌性清素臨終之日家無餘財唯有書數百

卷子肅周明帝初為宣納上士轉中外府記室參軍中山公訓侍讀早有才名性頗輕猾時人比之魏諷卒以罪考竟終

李彥字彥士梁郡下邑人也祖光之魏淮南郡守父靜南青州刺史彥少有節操好學慕古孝建中解褐奉朝請孝武入關兼著作佐郎修起居注大統初除通直散騎侍郎累遷左戶郎中十二年省三十六曹為十二部改授戶部郎中封平陽縣子廢帝初拜尚書右丞轉左

丞彥在尚書十有五載屬軍國草創庶務殷繁留心省閣未嘗懈怠斷決如流畧無疑滯臺閣莫不歎其公勤服其明察遷給事黃門侍郎仍左丞賜姓宇文氏出為鄜州刺史彥以東夏未平固辭州任詔許之拜兵部尚書加驃騎大將軍開府儀同三司仍兼著作六官建改授軍司馬進爵為伯彥性謙恭有禮節雖居顯要於親黨之間恂恂如也輕財重義好施愛士時論以此稱之然素多疾而勤於莅職雖沈頓枕席猶理務不輟遂至

於卒諡曰敬彥臨終遺誡其子等曰昔人以窾木為櫨
葛纍為絨下不亂泉上不泄臭實吾平生之志也但事
既矯枉恐為世士所譏今可斂以時服葬於磽磽之地
勿用明器芻塗及儀衛等爾其念哉朝廷嘉焉不奪其
志子昇明嗣少歷顯職大象末太府中大夫儀同大將
軍仕隋終於齊州刺史子仁政長安縣長義軍至以罪
誅

郭彥太原陽曲人也其先從宦關右遂居馮翊父盾靈

武令彥少知名周文帝臨雍州辟為西曹書佐累遷虞
部郎中大統十二年初選當州首望統領鄉兵除帥都
督以居郎官著稱封龍門縣子進大都督恭帝元年除
兵部尚書仍以本兵從柱國于謹南伐江陵進驃騎大
將軍開府儀同三司進爵為伯六官建拜戶部中大夫
周孝閔帝踐阼出為澧州刺史蠻左生梗不營農業彥
勸以耕稼人皆務本亡命之徒咸從賦役先是以澧州
糧儲乏少每令荊州遞送自彥莅職倉庾充實無轉輸

之勞齊南安城王馮顯密遣使歸降其衆未之知也柱
國宇文貴令彥率兵應接時齊人先令顯率所部送糧
南下彥懼其衆不從命乃於路邀之顯因得自拔其衆
果拒戰彥縱兵奮擊並虜獲之以南安無備即引軍掩
襲遂有其城晉公護嘉之進爵懷德縣公入為工部中
大夫保定四年晉公護東討彥從尉遲迥攻洛陽迥復
令彥與權景宣出汝南及軍次豫州使彥鎮之天和中
為隴右府總管府長史卒於官贈小司空宜鄜丹三州

刺史

梁昕字元明安定烏氏人也世為關中著姓其先因官徙居京兆之鰲屋祖重耳漳縣令父勸儒中散大夫贈涇州刺史昕少溫恭見稱州里從余朱天光征討拜右將軍太中大夫周文帝迎魏孝武軍次雍州昕以三輔望族上謁周文見昕容貌瓌偉深賞異之即授右府長流參軍累遷丞相府主簿大統十二年除河南郡守遷東荊州刺史昕撫以仁惠蠻夷悅之封安定縣子周孝

閔帝踐祚進位驃騎大將軍開府儀同三司明帝初進
爵胡城縣伯天和初拜工部中大夫出為陝州總管府
長史昕性溫裕有幹能歷官內外咸著聲稱尋卒官贈
大將軍諡曰貞昕弟榮位計部下大夫開府儀同三司
朝那縣伯贈涇寧幽三州刺史諡曰靜子巖仕隋為給
事郎貞觀中終於鄭州刺史

皇甫璠字景瑜安定三水人也世為西州著姓後徙居
京兆父和本州中從事大統末追贈散騎常侍儀同三

司涇州刺史璠少忠謹有幹畧永安中辟州都督周文帝為牧補主簿以勤事被知大統四年引為丞相府行參軍周孝閔帝踐阼為守廟下大夫長樂縣子保定中為鴻州刺史入為小納言累遷蕃部中大夫進驃騎大將軍開府儀同三司璠性平和小心奉法安貞守志恒以清白自處當時稱為善人建德三年為隋州刺史政存簡惠百姓安之卒官贈交渭二州刺史諡曰恭子諒少知名大象中位吏部下大夫諒弟誕

誕字玄慮少剛毅有器局開皇中累遷治書侍御史朝臣無不肅憚焉後為尚書左丞時漢王諒為并州總管朝廷盛選寮佐拜誕并州總管司馬總府政事一以諮之諒甚敬焉及煬帝即位諒用諮議王類謀發兵作亂誕數諫止諒不納誕因流涕以死固請諒怒囚之及楊素將至諒屯清涼以拒之諒主簿豆盧毓出誕於獄協謀閉城拒諒襲擊破之並抗節遇害帝以誕亡身殉國嘉悼者久之詔贈柱國封弘義公諡曰明子無逸嗣尋

為清陽太守甚有聲稱大業初令行舊爵例除以無逸
誠義之後賜爵卒與侯入為刑部侍郎守右武衛將軍
初漢王諒之反州縣莫不響應有嵐州司馬陶世模繁
時令敬釗並抗節不從世模京兆人性明敏有器幹仁
壽初為嵐州司馬諒反刺史喬鍾葵將赴之世模以義
拒之臨之以兵辭氣不撓鍾葵義而釋之軍吏請斬之
於是被囚及諒平拜開府授大興令從衛玄擊楊玄感
以功進位銀青光祿大夫釗字積善河東蒲坂人父元

約周布憲中大夫釗仁壽中為繁峙令甚有能名漢王
諒反師陷其城賊帥墨弼執送偽將喬鍾葵署為代州
總管司馬釗正色拒之誓之以死會鍾葵敗釗遂免卒
於朝邑令

辛慶之字餘慶隴西狄道人也世為隴右著姓父顯宗
馮翊郡守贈雍州刺史慶之少以文學徵詣洛陽對策
第一除秘書郎屬尔朱氏作亂魏孝莊帝令司空楊津
為北道行臺節度山東諸軍以討之津啓慶之為行臺

左丞與參謀議至鄴聞孝莊帝崩遂出兗冀間謀結義
徒以赴國難尋而節閔帝立乃還洛陽及賀拔岳為行
臺復啓慶之為行臺吏部郎大統初從周文帝東討為
行臺左丞六年行河東郡事九年入為丞相府右長史
兼給事黃門侍郎除度支尚書復行河東郡事遷南荊
州刺史加儀同三司慶之位遇雖隆而率性儉素車馬
衣服亦不尚華侈志量淹和有儒者風度特為當時所
重又以其經明行修令與盧誕等教授諸王廢帝二年

拜祕書監卒官子加陵主寢上士慶之族子昂

昂字進君數歲便有成人志行有善相人者謂其父仲
畧曰公家雖世載冠冕然名德富貴莫有及此兒者仲
畧亦重昂志氣深以為然年十八侯景辟為行臺郎中
景後來附昂遂入朝除丞相府行參軍後追論歸朝勲
封襄城縣男及尉遲迥伐蜀昂占募從軍蜀平迥表昂
為龍州長史領龍安郡事州帶山谷舊俗生梗昂威惠
洽著吏人畏而愛之成都一方之會風俗舛雜迥以昂

達於從政復表昂行成都令昂到縣便與諸生祭文翁
學堂因共歡晏謂諸生曰子孝臣忠師嚴友信立身之
要如斯而已若不事斯語何以成名各宜自勉克成令
譽昂言切理至諸生等並深感悟歸而告其父老曰辛
君教誡如此不可違之於是井邑肅然咸從其化遷梓
潼郡守六官建入為司隸上士襲爵繁昌縣公保定二
年為小吏部時益州殷阜軍國所資經塗艱險每苦刼
盜詔昂使於益梁軍人之務皆委決焉昂撫導荒梗頗

得寧靜天和初陸騰討信州蠻詔昂便於通渠等州運糧饋之時臨信楚合等諸州人庶多從送昂諭以禍福赴者如歸乃令老弱負糧壯夫拒戰莫有怨者使還屬巴州萬榮郡人反叛圍郡城昂於是遂募通開二州得三千人倍道兼行出其不意又令其衆皆作中國歌直趣賊壘謂有大軍赴救望風瓦解朝廷嘉其權以濟事詔梁州總管杞國公亮即於軍中賞昂奴婢二十口緡綵四百疋又以昂威信布於宕渠遂表為渠州刺史轉

通州推誠布信甚得夷獠歡心秩滿還京首領皆隨昂詣闕朝覲以昂化洽夷落進位驃騎大將軍開府儀同三司時晉公護執政昂稍被護親待武帝頗銜之及誅護加之捶楚因此遂卒昂族人仲景好學有雅量其高祖欽後趙吏部尚書雍州刺史子孫因家焉父歡魏隴州刺史朱陽公仲景年十八舉文學對策高第拜司空府主簿建德中位內史下大夫開府儀同三司卒于家

子衡

王子直字孝正京兆杜陵人也世為郡右族父琳州主簿東雍州長史子直性節儉有幹能魏正光中州辟主簿起家奉朝請永安初拜鴻臚少卿孝武西遷封山北縣男大統初漢熾屠各阻兵於南山與隴東屠各共為屑齒周文帝令子直率涇州步騎五千討破之賜書勞問除尚書左外兵郎中兼中書舍人從解洛陽圍經河橋戰兼尚書左丞出為秦州總管府司馬時涼州刺史宇文仲和據州逆命子直從隴右大都督獨孤信討平

之復入為大行臺郎中兼丞相府記室除太子中庶子
領齊王友尋行馮翊郡事廢帝元年拜使持節大都督
行瓜州事務以德政化人西土悅附恭帝初徵拜黃門
侍郎卒官子宣禮柱國府參軍

杜杲字子暉京兆杜陵人也祖建魏輔國將軍贈蒙州
刺史父皎儀同三司武都郡守杲學涉經史有當世幹
畧其族父攢清貞有識鑒深器重之常曰吾家千里駒
也攢時仕魏為黃門侍郎兼度支尚書衛大將軍西道

大行臺尚孝武妹新豐公主因薦之朝廷永熙三年起家奉朝請周明帝初為修城郡守屬鳳州人仇周貢等構亂攻逼修城杲信洽於人部內遂無叛者尋率郡兵與開府趙昶合勢並破平之入為司會上士初陳文帝弟安成王頊為質於梁及江陵平頊隨例遷長安陳人請之周文帝許而未遣至是帝欲歸之命杲使焉陳文帝大悅即遣使報聘并賂黔中數州地仍請畫野分疆永敦隣好以杲奉使稱旨進授都督行小御伯更往分

界陳於是歸魯山郡帝乃拜頊柱國大將軍詔杲送之
還國陳文帝謂杲曰家弟今蒙禮遣實是周朝之惠然
不還魯山亦恐未能及此杲答曰安成之在關中乃咸
陽一布衣耳然是陳之介弟其價豈止一城本朝親睦
九族恕已及物上遵太祖遺旨下思繼好之義所以發
德音者蓋為此也若知止侔魯山固當不貪一鎮况魯
山梁之舊地梁即本朝藩臣若以始末言之魯山自合
歸國云以尋常之土易已骨肉之親使臣猶謂不可何

以聞諸朝廷陳文帝慙惡久之乃曰前言戲之耳自是接遇有加常禮及還引升殿親降御座執手以別朝廷嘉之授大都督小載師下大夫行小納言復聘於陳及華皎來附詔令衛公直都督元定等援之定等并沒自是連兵不息東南搔動武帝授杲御正中大夫使陳論保境息人之意陳宣帝遣其黃門侍郎徐陵謂杲曰兩國通好彼朝受我叛人何也杲曰陳主昔在本朝非慕義而至主上授以柱國位極人臣子女玉帛備禮將送

今主社稷孰謂非恩郝烈之徒邊人狂狡曾未報德而先納之今受華氏正是相報過自彼始豈在本朝陵曰彼納華皎志圖吞噬此受郝烈容之而已且華皎方州列將竊邑叛亡郝烈一百許戶脫身逃竄大小有異豈得同年而語乎杲曰大小雖殊受降一也若論先後本朝無失陵曰周朝送主上還國既以為恩衛公共元定度江孰云非怨計恩與怨亦足相埒杲曰元定等軍敗身囚其怨已滅陳主負扆馮玉其恩猶在且怨由彼國

恩起本朝以怨酬恩未之聞也陵笑而不答杲因陳和
通之使陵具以聞陳宣許之遂遣使來聘建德初授司
城中大夫仍使於陳宣帝謂杲曰長湖公軍人等雖築
館處之然恐不能無北風之戀王褒庾信之徒既羈旅
關中亦當有南枝之思耳杲揣陳宣意欲以元定軍將
士易王褒等乃答之曰長湖總戎失律臨難苟免既不
死節安用此為且猶牛之一毛何能損益本朝之議初
未及此陳宣帝乃止及杲還至石頭又遣謂之曰若欲

合從共圖齊氏能以樊鄧見與方可表信杲答曰合從
圖齊豈唯弊邑之利必須城鎮宜待得之於齊先索漢
南使臣不敢聞命還除司倉中大夫又使於陳杲有辭
辭開於占對前後將命陳人不能屈陳宣帝甚敬異之
時元定已卒乃禮送開府賀拔華及定棺柩杲受之以
歸除河東郡守遷溫州刺史賜爵義興縣伯大象元年
徵拜御正中大夫復使陳二年除申州刺史加開府儀
同大將軍進爵為侯除同州刺史隋開皇元年以杲為

同州總管進爵為公俄遷工部尚書二年除西南道行
臺兵部尚書尋以疾卒子運大象末宣納上士杲兄長
暉位儀同三司

呂思禮東平壽張人也性溫潤不雜交遊年十四受學
於徐遵明長於論難諸生為之語曰誨書論易鋒難敵
十九舉秀才對策高第除湘州功曹參軍葛榮圍鄴思
禮有守禦勲賜爵平陸縣伯除藥城令普泰中僕射司
馬子如薦為尚書二千石郎中尋以地寒被出兼國子

博士乃求為關西大行臺郎中與姚幼瑜茹文就俱入
關為行臺賀拔岳所重專掌機密甚得時譽岳為侯莫
陳悅所害趙貴等議遣赫連達迎周文帝思禮預其謀
及周文為關西大都督以思禮為府長史尋除行臺右
丞以迎魏孝武功封汝陽縣子加冠軍將軍拜黃門侍
郎文帝即位領著作郎除安東將軍都官尚書兼七兵
殿中二曹事從禽竇泰進爵為侯大統四年以謗訕朝
政賜死思禮好學有才雖務兼軍國而手不釋卷晝理

政事夜即讀書令蒼頭執燭燭燼夜有數升沙苑之捷
命為露布食頃便成周文歎其工而且速所為碑誄表
頌並傳於世七年追贈車騎將軍定州刺史子亶嗣大
象中位至駕部下大夫時有博陵崔騰早有名譽歷職
清顯為丞相府長史亦以投書謗議賜死

徐招字思賢高平鄉人也世為著姓招少好法律及朝
廷舊事發言措筆常欲辯析秋毫初入洛陽雖未登仕
已為時知朝廷疑事多預議焉延昌中從征浮山堰有

功賜爵高廣男及廣陽王深北討鮮于修禮啓為員外散騎侍郎深府長流參軍招陳策請離間之葛榮竟殺修禮自為魁帥以功進爵為侯永安初射策甲科除員外散騎常侍領尚書儀曹郎中招少習吏事未能精究朝儀常恨才達恐名迹不立久之方轉二千石郎中尔朱榮死尔朱世隆屯兵河橋莊帝以招為行臺左丞自武牢北度引馬場河内之衆以抗世隆後尔朱兆得招鎖送洛陽仲遠數招罪將斬之招曰不虧君命得死為

韋仲遠重之曰凡人受命理各為主今若為戮何以勸人臣乃釋之用為行臺右丞及仲遠南奔招獨還洛永熙末從孝武入關中拜給事黃門侍郎兼尚書右丞時朝廷播遷典章遺闕至於臺省法式皆招所記論者多焉大統三年拜驃騎將軍侍中時文帝舅子王起化犯罪死有詔追贈招執奏正之後卒於度支尚書子山雲嗣

檀翥字鳳翔高平金鄉人也六世祖毓晉步兵校尉父

江始還北仕至太常少卿贈兗州刺史翦十歲喪父還京師宅與營人雜居雖幼孤寒不與隣人來往好讀書解屬文能鼓琴早為琅邪王誦所知年十九以名家子為魏明帝挽郎後客遊三輔時毛遐為行臺鎮北維表翦為行臺郎中莊帝既誅尔朱榮遐使翦詣京師因除著作佐郎郎中如故後孝武帝西幸除兼中書舍人修國史大統初又兼著作佐郎以守闕迎駕勲封高堂子後坐談論輕躁為黃門侍郎徐招所紿死於廷尉獄

孟信字脩仁廣川索廬人也家世貧寒頗傳學業信常
曰窮則變變則通吾家世傳儒學而未有通官當由儒
非世務也遂感激棄書從軍永業末除奉朝請從孝武
帝入關封東州子趙平太守政尚寬和權豪無犯山中
老人曾以狔酒饋之信和顏接引慙懃勞問乃自出酒
以鐵鐺溫之素木盤盛蕪菁菹唯此而已又以一鐺借
老人但執一盃各自斟酌申酬酢之意謂老人曰吾至
郡來無人以一物見遺今卿獨有此餉且食菜已久欲

為卿受一牼耳酒既自有不能相費老人大悅再拜
擘牼進之酒盡方別及去官居貧無食唯有一老牛其
兄子賣之擬供薪米券契已訖市法應知牛主住在所
信適從外來見買牛人方知其賣也因告之曰此牛先
來有病小用便發君不須也杖其兄子二十買牛人嗟
異良久呼信曰孟公但見與牛未必須其力也苦請不
得乃罷買牛者周文帝帳下人周文深歎異焉未幾舉
為太子少師後遷太子太傅儒者榮之特加車騎大將

軍儀同三司散騎常侍辭老請退周文不奪其志賜車馬几杖衣服床帳卒於家贈冀州刺史諡曰戴子儒

宗懔字元懔南陽涅陽人也八世祖承永嘉亂討陳敏有功封柴桑縣侯除宜都郡守卒官子孫因居江陵父高之梁山陰令懔少聰敏好讀書晝夜不倦語輒引古事鄉里呼為小兒學士梁大同六年舉秀才以不及二宮元會例不對策及梁元帝鎮荊州謂長史劉之遴曰貴鄉多士為舉一有意少年之遴以懔應命即日引見

令兼記室嘗夕被召宿省使製龍川廟碑一夜便就詰朝呈上梁元帝歎美之後歷臨汝建城廣晉三縣令遭母憂去職哭輒嘔血兩旬之內絕而復蘇者三每旦有羣鳥數千集于廬舍候哭而來哭止而去時論以為孝感所致梁元帝即位擢為尚書侍郎封信安縣侯累遷吏部尚書慄父高之先為南臺書侍御史犯憲慄願父釋罪當終身菜食高之理雪故慄菜食鄉里稱之在元帝府府中多言其矯至是大進魚肉國子祭酒沛國劉

穀讓之曰本知卿不忠猶謂卿孝今日便是忠孝並無
慄不能對慄博學有才藻口未嘗譽人朋友以此少之
初侯景平後梁元帝議還建鄴唯慄勸都渚宮以鄉在
荊州故也及江陵平與王褒等入關周文帝以慄名重
南土甚禮之周孝閔帝踐阼拜車騎大將軍儀同三司
明帝即位又與王褒等在麟趾刊定羣書數蒙宴賜保
定中卒有集二十卷行於世

劉璠字寶義沛人也六世祖敏以永嘉亂徙居廣陵父

臧性方正篤志好學居家以孝聞仕梁為著作郎璠九歲而孤居喪合禮少好讀書兼善文筆十七為上黃侯蕭曄所器重范陽張綰梁之外戚才高口辯見推於世以曄懿貴亦假借之璠年少未仕而負才使氣不為之屈綰嘗於新渝侯宅因酒後詬京兆杜杲曰寒士不遜璠厲色曰此坐誰非寒士璠本意在綰而曄以為屬已辭色不平璠曰何王之門不可曳長裾也遂拂衣而去曄謝之乃止後隨曄在淮南璠母在建康遭疾璠弗之

知嘗忽一日舉身楚痛尋而家信至云其母病璠即號泣戒道絕而又蘓當身痛之辰即母死之日居喪毀瘠遂感風氣服闋後一年猶杖而後起及曄終於毗陵故吏多分散璠獨奉曄喪還都墳成乃退梁簡文時東宮遇曄素重諸不送者多被劾責唯璠獨被優賞解褐王國常侍非好也璠少慷慨好功名志欲立事邊城不樂隨牒平進會宜豐侯蕭脩出為北徐州刺史即請為其輕車府主簿兼記室叅軍脩為梁州又補為中記室補

華陽太守屬侯景度江梁室大亂脩以璠有才略甚親
委之時寇難繁興未有所定璠乃喟然賦詩以見志其
末章曰隨會平王室夷吾匡霸功虛薄無時用徒然慕
昔風脩開府置佐史以璠為諮議叅軍仍領記室梁元
帝承制授樹功將軍鎮西府諮議叅軍賜書曰鄧禹文
學尚或執戈葛洪書生且云破賊前脩無遠屬望良深
元帝尋以脩紹鄱陽之封且為雍州刺史復以璠為脩
平北府司馬及武陵王紀稱制於蜀以璠為中書侍郎

遣召璠使者八反乃至蜀又以為黃門侍郎令長史劉
孝勝深布心腹使工畫陳平度河歸漢圖以遺之璠苦
求還中記室韋登私曰殿下忍而蓄憾足下不留將致
大禍脫使盜遮於葭萌則卿殆矣孰若共構大夏使身
名俱美哉璠正色曰卿欲緩頰於我邪我與府侯分義
已定豈以寵辱夷險易其心乎丈夫立志當死生以之
耳殿下方布大義於天下終不逞志於一人紀知不為
已用乃厚贈而遣之臨別紀又解其佩刀贈璠曰想見

物思人璠曰敢不奉揚威靈剋翦姦宄紀於是遣使拜脩為益州刺史封隨郡王以璠為府長史加蜀郡太守遠至白馬西屬達奚武軍已至南鄭璠不得入城遂降武周文帝素聞其名先戒武曰勿使劉璠死故武先令璠赴闕周文見之如舊謂僕射申徽曰劉璠佳士古人何以過之徽曰晉人滅吳利在二陸明公今平梁漢得劉璠也時南鄭尚拒守達奚武請屠之周文將許焉唯令全脩一家而已璠乃請之於朝周文怒而不許也璠

泣而固請移時不退柳仲禮侍側曰此烈士也周文既
納蕭脩降又許其反國脩至長安累月未之遣也璠因
侍宴周文曰我於古誰比曰常以公命世英主湯武莫
逮今日所見曾是齊桓晉文之不若周文曰我不得比
湯武望與伊周為匹何桓文之不若乎對曰齊桓存三
亡國晉文不失信於伐原語未終周文撫掌曰我解爾
意欲激我耳即命遣脩脩請與璠俱遷周文不許以璠
為中外府記室遷黃門侍郎儀同三司嘗卧疾居家對

雪興感乃作雪賦以遂志焉初蕭脩在漢中與蕭紀牋
及答西魏書移襄陽文皆璠辭也周明帝初授內史中
大夫掌綸誥尋封平陽縣子在職清白簡亮不合於時
左遷同和郡守璠善於撫御莅職未期生羗降附者五
百餘家前後郡守多經營以致貲產唯璠秋毫無所取
妻子並隨羗俗食麥衣皮始終不改洮陽洪和二郡羗
常越境詣璠訟理蔡公廣時鎮隴右嘉其善政及遷鎮
陝州欲啓璠自隨羗人樂從者七百人聞者莫不歎異

陳公純作鎮隴右引為總管府司錄甚禮敬之卒於官著梁典三十卷有集二十卷行於世子祥

祥字休徵幼聰慧賓客見者皆號神童事嫡母以至孝聞其伯父黃門郎璆有名江左在嶺南聞而奇之乃令名祥字休徵後以字行於世十歲能屬文十二通五經仕梁為宜豐侯記室叅軍江陵平隨例入關中齊公憲召為記室府中書記皆令掌之封漢安縣子憲進爵為王以休徵為王友俄除內史上士武帝東征休徵陪侍

帷幄平齊露布即休徵文也累遷車騎大將軍儀同大將軍歷長安萬年二縣令頗獲時譽卒於官初璠所撰梁典始就未及判定而卒臨終謂休徵曰能成我志其在此書乎休徵脩定繕寫勒成一家行於世

行本璠兄子也父環仕梁歷職清顯行本起家梁武陵王國常待遇蕭脩以梁州北附遂與叔父璠歸周寓居新豐每以諷讀為事精力忘疲雖衣食乏絕宴如也性剛烈有不可奪之志周大冢宰宇文護引為中外府記

室武帝親總萬機轉御正中士兼領起居注累遷掌朝
下大夫周代故事天子臨軒掌朝典筆硯持至御坐則
承御大夫取進之及行本為掌朝將進筆於帝承御復
欲取之行本抗聲曰筆不可得帝驚視問之行本曰臣
聞設官分職各有司存臣既不得佩承御刀承御亦焉
得取臣筆帝曰然因令二司各行所職及宣帝嗣位多
失德行本切諫忤旨出為河內太守及尉遲迥作亂攻
懷州行本率吏人拒之拜儀同賜爵文安縣子隋文帝

踐阼拜諫議大夫檢校中書侍郎上嘗怒一郎於殿前
笞之行本進曰此人素清其過又小上不顧行本正當
上前曰陛下不以臣不肖令臣在左右臣言若是陛下
安得不聽臣言若非當致之於理安得輕臣而不顧臣
所言非私因置笏於地而退上斂容謝之遂原所笞者
時天下大同四夷內附行本以党項羌密邇封域最為
後服上表劾其使者曰臣聞南蠻遵校尉之統西域仰
都護之威比見西羗鼠竊狗盜不父不子無君無臣異

類殊方於斯為下不悟羈縻之惠詎知含養之恩狼戾
為心獨乖正朔使人近至請付推科上奇其志雍州別
駕元肇言於上曰有一州吏受人饋錢二百文律令杖
一百然臣下車之始與其為約此吏故違請加徒一年
行本駁之曰律令之行蓋發明詔今肇乃敢重其教命
輕忽憲章虧法取威非人臣之禮上嘉之賜絹百匹拜
太子左庶子領書侍御史如故皇太子虛襟敬憚時唐
令則為左庶子太子昵狎之每令以弦歌教內人行本

北史卷七十二考證

高頴傳蕭巖之叛詔頴綏集江漢○蕭監本訛蕭今改

正

今茲斬王積○積字上疑脫一世字

牛弘傳改姓遼氏○隋書作本姓奈氏

復姓牛氏○復隋書作賜

今御出單本合一萬五千餘卷○出隋書作書

聖人南面而聽嚮明而治○嚮監本訛嚮今改正

方建大禮垂之無窮○監本缺方字今增入
故待詔嚴嵩○嵩應改崇今各本俱同仍之

李德林傳帝以之付晉王諱○晉王諱云者百藥隋臣
故當諱耶又傳後無贊或亦以德林為其父故耳

北史卷七十二考證

責之曰庶子當匡太子以正道何嬖昵房帷之間哉令則甚慙而不能改時沛國劉臻平原明克讓河南陸爽等並以文學為太子所親行本怒其不能調護每謂三人曰卿等正解讀書耳時左衛率長史夏侯福為太子所昵嘗於閣內與太子戲福大笑聲聞於外行本時在閣下聞之待其出數之曰汝何小人敢為褻慢因付執法者推之太子為請乃釋之太子嘗得良馬令福乘而觀之太子甚悅因欲令行本復乘行本正色曰至尊置

臣於庶子位欲輔導殿下以正道非為殿下作弄臣太子慙而止復以本官領大興令權貴憚其方正無敢至其門者由是請託路絕吏人懷之未幾卒于官上甚傷惜之及太子廢上曰嗟乎若使劉行本在勇當不及此乎行本無子

柳遼字子昇河東解人宋太尉元景從孫也祖叔珍義陽內史事見南史父季遠梁宜都太守遼幼而爽邁神采嶷然髫歲便有成人之量篤好文學動合規矩其世

父慶遠特器異之謂曰吾昔逮事伯父太尉公嘗謂吾云我昨夢汝登一樓甚峻麗吾以坐席與汝汝後名宦必達恨吾不及見耳吾向聊復晝寢又夢將昔時坐席還以賜汝汝之官位當復及吾特宜勉勵以應嘉祥也梁西昌侯藻鎮雍州遐時年十二以百姓禮脩謁風儀端肅進止詳雅藻羨之試遣左右踐遐衣裾欲觀其舉措遐徐步稍前曾不顧盼仕梁稍遷尚書功論郎陳郡謝舉時為僕射引遐與語甚嘉之顧謂人曰江漢英靈

見於此矣岳陽王蕭詧於襄陽承制授遐吏部郎賜爵
聞喜公尋進位持節侍中驃騎大將軍開府儀同三司
及踐帝位於江陵以襄陽來歸辭詧曰陛下中興鼎
業龍飛舊楚臣昔因幸會早奉名節理當以身許國期
之始終自晉氏南遷臣宗族蓋寡從祖太尉世父儀同
從父司空並以位望隆重遂家于金陵惟留先臣獨守
墳柘嘗誡臣等使不違此志今襄陽既入北朝臣若陪
隨鑾蹕進則無益塵露退則有虧先旨詧重違其志遂

許之因留鄉里以經籍自娛周文帝明帝頻徵固辭以疾及歿廼舉哀行舊臣之服保定中又徵之廼始入朝授驃騎大將軍開府儀同三司霍州刺史廼導人務先以德再三不用命者乃微加貶異示耻而已其下感而化之不復為過咸曰我君仁惠如此其可欺乎卒贈金安二州刺史廼有至行初為州主簿其父卒于揚州廼自襄陽奔赴六日而至哀感行路毀悴不可識後舉喪西歸中流風起舟中人相顧失色廼抱棺號慟愬天

求哀俄頃風止浪息其母嘗乳間發疽醫云此疾無可
救理唯得人吮膿或望微止其痛遐應聲即吮旬日遂
瘳咸以為孝感所致性又溫裕略無喜愠之容弘獎名
教未嘗論人之短尤尚施與家無餘財臨終遺誡薄葬
其子等並奉行之有子靖莊最知名

靖字思休少方雅博覽墳籍仕梁正貲郎隨遐入周授
大都督歷河南廣德二郡守所居皆有政術吏人畏而
愛之然性愛閑素其於名利澹如也及秩滿還鄉便有

終焉之志隋文帝踐極特詔徵之以疾固辭優游不仕
閉門自守所對唯琴書而已足不歷園庭殆將十載子
弟奉之若嚴君焉其有過者靖必下帷自責於是長幼
相率拜謝於庭靖然後見之最以禮法鄉里亦慕而化
之或有不善者皆曰唯恐柳廣德知也時論方之王烈
前後總管到官皆親至靖家問疾遂以為故事秦王俊
臨州賚以几杖并致衣物靖唯受几杖餘並固辭其為
當時所重如此開皇中壽終

莊字思敬少有器量博覽墳籍兼善辭令濟陽蔡大寶
有重名於江左時為岳陽王蕭詧諮議見莊歎曰襄陽
水鏡復在於茲大寶遂以其女妻之俄而詧辟為參軍
及詧稱帝累遷鴻臚卿及隋文帝輔政蕭詧令莊奉書
入關時三方構難文帝懼歸有異志及莊還謂曰孤昔
以開府從役江陵深蒙梁王殊眷今主幼時艱猥蒙顧
託梁主奕業重光委誠朝廷而今已後方見松筠之節
君還申孤此意於梁主也遂執莊手而別時梁之將帥

咸請與尉遲迥連衡進可盡節於周氏退可席卷山南
唯歸疑不可會莊至自長安申文帝結託之意遂言於
歸曰今尉遲迥雖曰舊將昏耄已甚消難王謙常人之
下者非有匡合之才況山東庸蜀從化日近周室之恩
未洽於朝廷臣料之迥等終當覆滅隋公必私周國未
若保境息人以觀其變歸深以為然未幾消難奔陳迥
及謙相次就戮歸謂莊曰近若從衆言社稷已不守矣
文帝踐阼莊又入朝帝深慰勉之及為晉王廣納妃于


梁莊因是往來四五反前後賜物數千段梁國廢授開府儀同三司除給事黃門侍郎莊明習舊章雅達政事凡所駁正帝莫不稱善蘓威為納言重莊器識常奏帝云江南人有學業者多不習世務習世務者又無學業能兼之者不過柳莊高頴亦與莊甚厚莊與陳茂同官不能降意茂見上及朝臣多屬意於莊心每不平帝與茂有舊譖愬頗行尚書省嘗奏犯罪人依法合流而上處以大辟莊據法執之帝不從由是忤旨俄屬尚藥進

九藥不稱旨茂因奏莊不親監帝怒十一年徐璿等反於江南詔莊以行軍總管長史隨軍討之璿平即授饒州刺史甚有能名卒於官

論曰韓褒奉事三帝以忠厚知名趙肅平允當官張軌循良播美李彥譽流省閣郭彥信著蠻貊歷官出納並當時之選也梁昕皇甫璠辛慶之王子直杜杲之徒並關右之舊族或紆組登朝獲當官之譽或張壇出境有專對之才既茂國猷克隆家業美矣魏文帝云文人不

護細行其呂思禮之謂乎徐招檀翥孟信各以才學自立又加以清介並志能之士也宗懔才辭幹局見重梁元建乎播越秦中不預政事豈亡國俘虜不與圖存者乎梁氏據有江東五十餘載挾策紀事蓋亦多人劉璠學思通博有著述之譽雖傳疑傳信頗有詳畧而屬辭比事為一家之言行本正色抗言具存乎骨鯁柳遐立身之道進退有節觀其眷戀墳隴其孝可移於朝廷盡禮舊主其忠可事於新君夫能推此類以求賢則知

人幾於易矣莊亮直之風不殞門表忠而獲謗蓋亦自古有之



北史卷七十

北史卷七十考證

趙軌傳周蔡王引為記室○蔡監本訛蔡今改從隋書
其東隣有桑甚落其家○甚監本訛莫今改從隋書
張軌傳奉雍之間必有王者○奉周書作秦

郭彥傳累遷虞部郎中○虞監本訛寘今改從南本

皇甫誕傳諒用諮議王頔謀發兵作亂○頔隋書作頔
本書王頔弟頔傳云授漢王諒府諮議參軍又云諒
遂舉兵反頔之計也可知頔字之訛矣

孟信傳又以一鎗借老人○又監本訛文今改從南本
柳遐傳其世父慶遠特器異之○下文伯父太尉云夢
以坐席與汝汝後名宦必遠等語與梁書慶遠從父
兄世隆謂慶遠語畧同

北史卷七十考證